

嘉慶延安府志

延安府志卷五十三

傳錄

前政

明

湯和字鼎臣鳳陽人身長七尺側儻饒知略洪武四年以左御史大夫兼太子諭德率兵至定西襲擴廓帖木兒取寧夏至察罕腦兒獲其猛將虎陳定東勝大同宣府封中山侯八年冬追伯顏帖木兒獲之晉信國公贈東甌王傳友德宿州人爲江淮行省叅知政事洪武三年從取陝西三年克兩漢是秋征甘肅還封潁川侯九年副湯將軍駐

兵榆林出塞番兵縛伯顏帖木兒以降十四年封穎國公

延綏志

唐勝宗濠人年十八來歸多著勲績從穎川侯拔延安洪

武三年封延安侯

延綏志

徐瑄字子敬南直嘉定人正統中擢右僉都御史巡撫延

綏嚴斥埃繕甲兵督屯糧種修學校虜入寇四戰皆捷以

丁艱奪情遂上疏致仕

萬姓統譜

曹璉彬陽人以大理少卿叅贊延綏軍務機事疆濟軍民

賴之

萬姓統譜

王正邛州人右府都督正統中鎮守延綏於榆林建設城

及沿邊墩臺衛堡倉場控制邊鄙

延綏鎮志

馬恭唐縣人出舉人除陝西道監察御史正統八年奉命往陝西巡邊尋又奉命協贊延綏等處軍務九載任滿陞都察院右僉都御史仍理前事景泰二年以殺賊功陞右副都御史恭在邊十餘年軍政修明下人悅服四年以老疾致仕

議轉志

黃綬字用章封邱人巡撫巡綏嘗行部見軍婦片布遮下體乃歎曰兵之貧至此乃驅之戰守耶於是令預支米三月會詔毀庵寺綬使汰尼給配鰥軍人悅及去尼有携子女拜道路者

賈志

王銳遷安人進士成化時巡撫延綏滿四叛於石城率兵同叅將胡愷往討之寧夏兵失利遂議六路進兵銳與愷屯酸棗溝恃勇先進爲四所敗官軍四面攻之獨延綏兵與賊門相對殺傷者衆又軍於東山口回回楊虎力爲滿四謀主來約降相期於東山且云滿四最畏神鎗乃議移延綏營於山口滿四果騎白馬出戰銳麾兵進遂擒之石城平進銳左副都御史

延綏志

楊信字文實六合人幼武勇天順元年陞都督同知鎮延綏明年虜孛來毛里孩入塞擊退之明年虜入寧夏塞信合武平伯陳友兵來擊虜遁去四年封彰武伯食祿千石

與世券

萬姓統譜

湯引續字公讓號東谷東甌襄武王曾孫也周文襄忱聞其名召作啟事數萬言亭立具狀文襄薦其有文武才驛名赴京于少保謙講試之立將臺下問兵事應對如洪鐘萬衆環視歎賞卽授錦衣衛百戶嘗從興濟伯禮部尚書楊善通問英宗於塞外天順時爲校事摺披下獄謫爲民編籍常州成化初復官充叅將守禦延綏孤山堡堡無備戍卒不習戰一日登城曰四望黃沙白艸漫漫一腔血乃委於此耶三年八月套人入寇大掠子女而東續率麾下百餘人邀於境上力戰衆寡不敵死之續爲人軒豁倜

儻兩眸炯然髭鬚如戟掀髯談論視世人蔑如也爲歌詩  
豪放奇倔援筆揮灑如風電死之日邊人見一大將盛服  
鼓吹擁衆宿郵舍質明寂無人聲題詩壁間有云手持長  
劍斬渠魁一箭那知中兩腮戎馬踏來頭似粉烏鴉啄處  
骨如柴交遊有義空揮淚弟姪無情不舉哀血染遊魂歸  
未得幽冥空築望鄉臺書跡宛然衆以爲神也

延綏  
縣志

張欽睢寧人留守右衛指揮僉事以都督僉事總兵延綏  
慶陽諸路有柴溝之捷賜白金綵幣進都督同知專守延  
綏敵復入安邊營欽連戰有功特勅佩將軍印

延綏  
縣志

楊壁字應奎當塗人景泰甲戌進士除陝西泰政鑿延安

河漑田七千餘頃毀寶雞尼庵焚內史異術人皆服其持

正江南通志

王鑑太原人以御史左遷膚施令歷知延安府爲政寬和

民皆德之上言乞勅撫按分巡等官以時行邊從之延安府志

張鎮鳳陽定遠人延安衛指揮史膂力絕人每戰必提生

擒刺麻台被賊圍射落馬支解之賈志

馬文升字負圖河南鈞州人景泰二年進士成化四年特

拜文升巡撫陝西世法錄時漢中流民李黠子倡妖言挾衆

叛潼關軍餘火竭兒蒲城民王彪鑄山行刦文升悉捕滅

之虜牧河套文升築城堡募士授兵皆徙去延綏早設法



轉給芻粟條陳事若禦戎策上嘉納之

名山

文升巡撫陝

西奉公伸法亡所撓枉奸猾斃治者悉鎗發無隱貨經畧

諸邊有方而威惠行於吏民

雍大紀

羅詢永寧人天順中知延安府修延利渠築城垣徙府學設延豐倉數十所隨都御史余子俊築東西二路邊城又嘗教民樹藝紡績有治行

前府志

徐廷璋羅山人進士天順中以右僉都御史巡撫延綏成化間復以右僉都御史巡撫寧夏修葺壩口增立寨堡繕亭障時與陝西馬文升榆林余子俊稱關中三巡撫

朱永字景昌河南夏邑人成化初虜阿羅冠延綏永以平

虜將軍與左都御史王越擊之擒斬首虜數多虜馬牛羊  
甲械以萬計降勅卽軍中予世侯留鎮三邊宅虜復屯柳  
榆莊諸處出沒爲患永復與戰敗之克獲多賜金幣良厚

名山藏

崔陞安陽人孝宗卽位知延安府立規畫節浮費省遊宴  
清疆場復徵稅平徭役鋤強橫招流移墾荒實廩見宜川  
知縣馬鞍價值百金按之獲其貪狀遂黜之延人杜文祥  
笑陞貧陞知而不問有發其殺人事者罪不至死陞以生  
之君子稱其似韓稚圭在郡七年擢四川叅政

馬志

李延壽新城人御史調延安府廉明仁恕百姓流移者衆

乃作招撫詩六章使人下縣歌詠百姓相踵歸業遠近歌  
曰太守李君政通神欲雨得雨欲晴得晴嘗課教耕織建  
學正俗士民仰賴陞河南右叅政

賈志

王越字世昌潞縣人景泰辛未進士擢右副都御史成化  
庚寅奉命出延綏至崖窯川擒賊四十餘人斬首加百遷  
左副都御史又於黃草梁擒賊五人斬首百二十進右都  
御史癸巳進左都御史出延綏韓家塢斬首二百八十餘  
庚子封威寧伯充總兵官領延綏尋罷宏治丁巳特加太  
子太保總制甘肅寧夏延綏軍務鎮守巡撫而下悉聽節  
制加太保卒公入膺帥寄歷西北諸鎮身經百戰於邊徼

險易敵情誠偽將士之強弱勞逸皆歷歷在胸臆每出奇

取捷謀定後發同事者莫測所向

李東陽撰墓誌

成化九年越偵

知虜老弱巢紅鹽池率輕騎晝夜馳三百餘里襲擊之斬

獲甚衆虜自據奎以來無歲不深入殺掠人畜至數千百

萬至是虜內失其孥相與悲泣渡河北去患少弭

世法錄

劉潮榆林人以都指揮僉事協守延綏有文武材

延綏鎮志

項忠字彥臣嘉興人進士天順三年按察陝西會陝西饑

不待奏報輒發倉賑全活萬人徵爲大理卿陝人兩詣闕

借留者千數改右副都御史巡撫陝西後擒滿四殲李勣

子平洮岷番率師行陣雖矢石如雨無懼色成化元年奎

人入延綏塞忠及寧遠伯擊之遁去四年爲兵部尚書汪

直黨構之落職復爲兵部尚書致仕卒謚襄毅

延綏志

余子俊字士英青神人景泰二年進士天順初知西安府

西安故劇府兼邊事旁午子俊酬酢治辨六年爲關中冠

通子俊知西安府歲饑發廩出貨仍措畫如數償之西安

水多鹵宋龍首渠久廢或議引潏河水自丈八頭置牐入

城以洩於隍積滓旣久城且壞子俊因丈八之制開新渠

貫城中經漢故城達於渭以免公私之患人稱爲余公渠

都御史項忠上其治行賜勅旌異擢右叅政督三邊軍務

遷右布政使轉左使擢右副都御史巡撫延綏相度邊地

每徒行數十里盡得形勢上疏請於沿邊墩臺之隙築墩  
建堡又於界至之隙因山剗削其高若城每二三里則爲  
敵臺崖砦連比不絕又於中空築短牆橫一斜二如偃月  
狀以爲偵敵避射之所自清水管之紫城砦至寧夏之花  
馬池東西延袤二千里凡爲堡十有二環牆崖砦八百有  
奇小墩七十邊墩十五又移定邊安邊二營於近地或以  
爲棄地可惜子俊謂二營就險可守兼利耕牧省轉輸費  
是地未嘗棄也又請置榆林衛取通兵當勾及謫戍南土  
者之子孫益之凡內邊曠地皆墾爲屯田歲獲數萬石立  
武學以教子弟之俊秀者軍中器用鉅細畢具卒範鉄爲

之議以歲月蔬果之類亦隨宜教藝時加巡省自是敵過城下必囁指相顧莫敢近轉左副都御史進右都御史移鎮陝西陳弭盜安數事涇陽有舊堰不利灌溉每治輒壞子俊鑿山開道溉田千餘頃又鑿南山道直抵漢中以便饋餉名拜兵部尚書

懷麓堂集

王彥奇雲陽人知延安府清白剛方宏治末官軍駐兵於郡多求索擾彥奇嚴禁之民賴以安歲大荒出預備倉粟十萬石并庫銀三萬餘兩賑救之奏免其稅全活者甚衆又興學校作人材正風俗廣儲蓄釋冤滯恤孤獨建橋梁治水患通商賈弭盜賊文章政事名盛一時陞叅政延民

保留仍知府事

馬志

傅瑛綏德衛指揮使成化元年設鎮立堡命瑛督工清廉自持二年以功陞都指揮僉事八年守定邊有功授都指揮同知以紅鹽池之捷陞都指揮使二子釗鐸釗磨瑛爵屢立戰功正德初命統延綏義軍往來破敵有良將風鐸長於謀勇詞翰兼優以平洛川叛賊授都指揮數以寡勝衆一門孝友尤爲當時所稱

賈志

呂雯字天章北直安州人癸酉舉人巡撫延綏有警雯曰敵旣深入宜堅壁待之彼無所獲必因而歸歸則以勁兵邀其後可以得志果如其言旣又築邊城寇不得近山陝



饑榆林獨稔民流集者甚衆爰恐生變多方活之民恃以

安

賈志○按馬志  
作品爰與此異

神英字景賢延安衛指揮使驍勇敢戰先登累有斬獲功  
成化宏治間充總兵官守寧夏延綏宣府大同歷四鎮累  
官署都督正德五年封涇陽伯數月劉瑾敗言官交章劾  
英奪爵爲右都督

延綏  
鎮志

岳嵩舒城人涉獵經史襲延安衛指揮僉事以知勇累立  
奇功遷延綏鎮守總兵與都御史余子俊協謀修邊有功

延綏  
鎮志

楊一清字應寧雲南安寧州人成化八年進士宏治四年

補陝西提學副使歲試必遍八府三邊建書院以拔名學  
之俊秀躬督教令讀朱子白鹿洞規修禮器樂器弦歌盈  
於西土所識拔士如呂柟康海李夢陽之倫稱許爲大魁  
爲聞人皆如其言當是時宗室不能奪生員之婚撫按不  
能撓課試之權爲國朝提學之最一清留滯闕中八載復  
以其暇講究邊事舊通志宏治中擢左副都御史督理陝西  
馬政一清條上所宜及易置馬吏輒得施行十七年北寇  
潛伏河套兵部尚書劉大夏薦一清兼巡撫陝西經畧防  
禦明年設都御史總制陝西延綏甘肅寧夏軍務開府固  
原命一清爲之尋進右都御史正德元年冬虜復擁衆入

套一清揚兵以待之虜渡河北遁一清爲河套卽古朔方  
地唐張仁愿築三受降城以絕寇警今宜因險而增之上  
疏議修築上可其奏劉瑾憾一清不先白已阻尼之其年  
告休家居一清多才好問有謀善斷邊事旁午疏占指授  
悉中機宜所居止時演習營陣曰武侯衛公未嘗廢也時  
告諭諸將無事時常如有事隄防有事時常如無事鎮靜  
故其總邊無所廢失安化王翼鏞反徵拜陝西總制旣行  
視邊堡訪求營衛部領賢否更置之罷邊軍繁重科差清  
革鎮守太監若總兵而下所私役軍人軍將所據草灘湖  
地悉令還官均其屯田之賦凡有征調軍士全隊而出無

占隱者又請調延綏寧夏陝西三邊兵分道驅逐河西賊出境然後修沿邊舊守墩臺城堡以圖永久自劉瑾用邊糧浥爛罪先後守臣守臣不復積貯軍儲坐空一清多方召羅公私稍備尋召爲戶部尚書調吏部入內閣致仕世宗四年虜大入關隴卽家拜兵部尚書兼左都御史提督陝西三邊溫詒褒美比之趙充國馬援郭子儀故相行邊自一清始

通志

陳鼎山東登州人進士正德中以陝西右叅議撫治商洛時礦賊馬隆聚衆劫掠聲振三輔鼎率官兵討平之擢副使兵備延綏撫禦有方陞浙江按察使

賈志

閻文靈壁人延安衛指揮使知兵法累立戰功

馬志

孫隆江南和州人延安衛指揮同知性清儉不事產業謀

勇過人邊功顯著累官至叅將

舊府志

陳壽字本仁遼東寧遠衛籍新淦人進士累官右副都御史巡撫延綏會寇分兵入掠躬親甲冑爲將卒先遇寇鏖戰擒獲八十有餘未幾火篩脫羅干諸部糾衆大至先以百餘騎誘戰諸將請赴之壽自出帳擁左右數十騎據牀飲食如無事敵望見疑之遂引去旣而諸路將領擊寇皆大捷斬首數千級

賈志

壽廉名甚著粗衣糲食如寒士巡撫

延綏創火篩有功時同事諷壽註子弟於戰籍壽曰吾子

弟未諳弓馬豈可欺罔以邀得賞平時論多其賢

廉平正錄

德九年以都御史巡撫陝西下車旬日卽出榜諭衆利病之原罔不悉具仍令長安父老面陳得失量斗斛平市價禁有司官市民物時劇盜數十剽掠良民命捕之盜賊屏息又下令曰遭喪者不許停柩婚嫁不許索財人皆遵之夏大旱令各街巷開渠以通陰氣減刑殺清冤獄齋心誠禱天乃大雨歲大熟時勢豪中官廖堂煽虐歲貢毡帳糜費鉅萬民苦於科創壽連疏劾罷之遷南京刑部侍郎顏行秦中老少相與爭送遮留

龐大記

陸杰字元望浙江平湖人進士歷遷陝西鄜延兵備副使

賊兵大入杰督兵出戰斬戮甚多寇數歲不敢近邊

賈志

陳輝延安人先爲延綏副將成化二十三年以功陞都督僉事鎮守幼習韜略累立戰功

縣志

張安大同人治十三年以都督僉事鎮守延綏爲人多

謀畧嘗遇敵以單騎却之人服其勇

延綏志

劉忠字擴誠漢州人舉人巡撫延綏嚴斥墩練材用廣儲

積蓄芻牧塞下晏然

縣志

熊繡字汝明道州人進士御史先巡按陝西風紀大振後撫延綏恒蔬食以自勵雖廩米有羨亦斥還官性孝友尚清節及死家無餘財嗣兄子復天郴州何孟春爲之請謚

下部奏准給繼孫熊瑞月米一石謚莊簡

縣志

劉文字道顯慶陽衛指揮使以功鎮延綏民望旌旗所駐如父至及其去也扶轡涕泣充塞道路每諸將晨謁畢卽召入閣中計事人獻所長至臨陣授畫獨其人知之故所向成功且忠信亮易上下咸親雖古良將弗如也尋以疾

卒於鎮謚武襄

延綏鎮志

李懷信山西大同人任定邊副將知勇兼優每戰躬先士

卒斬馘無算西邊倚重

延綏鎮志

李鉞字虔甫河南祥符人進士嘉靖壬午春以兵侍兼僉都御史行邊敵入延綏設伏邀擊之斬首百餘級或請以



捷聞曰偶勝耳惡足為功鎮巡奏捷聖書嘉之

賈志

杜希茂榆林人鎮靖泰將時值饑荒居民流離無以復業希茂百計招勸市牛給種開墾邊外沃地勞來備至復歛

結北人并無侵掠數年後遂大稔

延綏鎮志

殷尚賢北直天津人襲父職充遊擊將軍駐延安時內盜

外訐四野洶洶遊擊為一時創設兵皆市人不習練尚賢

厲至忠武身先士卒嚴刁斗多問謀而泰以通甲孤虛諸

法屢殲敵諸鎮之兵延安稱強

賈志

周金字子庚武進人正德戊辰進士以僉都御史巡撫延

綏會大同殺都御史報至金乃開門名諸將吏軍卒盡入

環列庭下謂之曰若輩知大同教都御史乎衆曰知之金  
曰若輩以殺之爲得已耶非得已耶衆叩頭曰狂賊自取  
族耳尚何道金曰不然邊人勞苦甚矣而又虐使之是趣  
之殺也假令上下素相愛若父子彼將倚以爲命縱授之  
刃使殺焉其誰忍乎衆大歡呼叩頭退當是時以片言解  
上下疑阻自謂得應機之知云

馮志

辛忠和州人延安衛千戶少遊郡庠知兵法遇敵輒有功

累陞都指揮同知

舊志

彭清綏德人任延綏副總兵分守黃甫川敵擾邊清征討  
有功陞都督僉事佩總兵印以清謹見稱

舊志

王威綏德衛人鎮守延綏勇畧過人敵不敢犯一門多將材死於王事

舊志

陳璘字邦瑞陽曲人宏治癸丑進士拜御史遷陝西苑馬少卿馬大蕃息時少師楊公一清總制三邊疏薦之遷布政司叅政監督軍餉於是邊儲大足遷右副都御史巡撫延綏時邊警特甚璘繕城堡利器械足倉廩募兵選將寇入輒斬獲屢賜金幣時總兵抑勇叅將李永定把總許國卜雲交結中貴緣爲姦利邊人目爲四害璘劾罷之三軍稱快會江彬遵上北巡蹕蹕延綏三閱月彬黨橫甚璘執大體酌時宜彬黨莫能害有成獄彬持之亦不聽邊人呼

爲真都御史云

苑洛集

唐龍字虞佐浙江蘭谿人進士以監察御史陞陝西按察副使提督學校時士學趨詭異乃新正學書院選士羣肄之剗其奇靡而約詒理其所登進悉爲名臣嘉靖十年塞外吉囊擁衆十五萬入據河套俺答衆號四十萬亦出沒邊徼全陝戒嚴特陞兵部尚書兼副都御史總制三邊明年秋敵以精騎三千潰鎮遠關入薄平遠城乃督梁震王劾等分左右哨馳至柳門夾擊破之敵浮河而遁吉囊自將十萬騎入營花馬池乃令曰侵延綏張鳳主之寧夏固原王劾劉文主之其折衝批亢則委之梁震部分已定敵

從青沙峴入延安文率所部迎戰伏起乘之敵大敗於時  
王効敗敵於興武營梁震敗敵於乾溝二旬間凡三捷龍  
於三邊四鎮山川地形險阨歷歷如指諸掌爲圖置座隅  
坐而籌之咸中機要動必有功在邊四年朝廷倚重

賈志

劉梅延綏副總兵嘉靖三十二年北人入邊梅出戰死之

續文獻  
通考

賈啟湖廣黃岡人進士任陝西苑馬寺卿後以右副都御  
史巡撫延綏練達治體尤通相地觀象之術

賈志

劉天和字養和其先南昌人徙麻城正德三年進士嘉靖  
十三年以兵部侍郎拒虜三邊居四歲前後與虜戰二十

七合得虜首數千級先是天和諜知虜將大入集諸將以所賜金爲牛酒饗士出二劍陳堂皇指左劍曰將不用命者徇此右劍曰卒不用命者徇此及期虜果入邊帥醉不備虜登陴天和聞之夜馳八十里至花馬池乃引而西天和召醉帥立斬之與延綏將周尚文追擊虜大破之天子卽軍中加天和太子太保

名山藏

余良弼巴陵人舉人遷延安郡丞修城堡申斥堠軍政肅然兩膺寵命卒於任

湖廣通志

張聽字鶴舉南直泰興人舉人以右副都御史巡撫延綏榆林孤懸塞外於九邊獨稱難守聽至卽舉邊務之最急

者條上十餘事上悉嘉納著爲永規敵兵兩入兩敗之加

右司馬仍賜金幣

延綏  
鎮志

張子立字原禮山東黃縣人進士以御史歷陞延綏巡撫  
修城堡開紅石硤以通水利民庶攸賴用兵西夏失利遂  
被逮士民號泣遮道中使亦泣下延人爲立碑於學宮

馬志

楊根字伯深祥符人嘉靖辛卯舉人爲鳳翔推官奉法惟  
謹嘗攝隴州議丁糧里遞多便於民隨御史按部惟剔大  
蠹巨姦餘悉不問遷延安同知調度兵馬收支芻馬餉糈

修城堡稽核功罪無不倚辦以病致仕

祥符  
縣志

周尚文陝西西安後衛指揮同知宏治正德中數出塞逐

虜有功進指揮使歷陞征西將軍鎮守延綏與巡撫都御史賈起不協方坐譴奪職會虜吉囊入寇鋒甚銳總督尚書劉天和檄起之遂有黑水苑之戰自己至申凡三合軍氣乃振三鎮斬獲四百餘級陞尚文都督同知嘉靖十九年也

通志

曾銑字子重江都人嘉靖八年進士二十五年秋虜寇陝西三邊督撫一時被逮總督難其人上以屬銑遂兼程往時賊十萬騎由寧塞突入銑曰虜糾衆來當攻其所必救遂命中軍參將李珍率勁卒搗其巢穴斬獲百十一有奇卒以示虜虜大懼遁去銑復計曰醜虜頻年內侵如蹈無



人之境今驟聞巢穴有急倉皇遁去不料我師邀其前也親督將士由新安邊外直趨定邊擊之黎明虜見大將旗鼓相顧錯愕遂大潰奪獲馬器無算銑不以捷聞御史勘功始奏銑績且有功不伐尤邊臣所難詔以銀幣重賞之明年復出塞斬虜賞銀幣有加銑感知遇益思圖報念套虜爲中國患乃上疏議復套因條爲八事上令銑督同各邊撫鎮協心圖議務求長策嗣上方畧復條上十八事銑知上倚注方深晝夜講求演成行師機宜列爲八圖次第其說上之於是領兵入套攻搗斬首二十七級生擒脫脫虎一人餘斃矢石者甚衆獲馬牛駝及夷器以千計虜十

萬騎自寧塞入犯延安保安諸處銑遣叅將珍夜出塞劫其營帳斬首百餘級自是虜聞銑來皆嚙指多移營渡河矣時仇鸞爲總兵驕恣悖逆陰洩事機銑劾其違法詔械繫鸞會嚴嵩父子方謀傾夏言鸞因重賂世蕃并捏危言搆銑羅織成獄天下冤之隆慶初詔贈尚書謚襄愍

名山藏

王以旂字士招江寧人正德辛未進士累官兵部尚書陝西總督曾銑倡議復套被逮命以旂代之入關亟罷郡縣軍需停造器具又嚴盜馬之罰禁劫營之弊敵入波羅堡及高家堡皆督師敗之俘獲無算修爲延安等處城堡墩臺卒於固原諸鎮軍民爲罷市者數日贈少保謚襄敏

賈志

張珩字佩玉山西石州人正德間進士授監察御史巡按

陝西所至貞憲釐弊獎廉黜貪時稱名御史

萬姓統譜

珩陞右

僉都御史撫延綏值歲饑躬茹疏糲一老妾供炊歛公私

所有以飽士士見珩癯咸勸加食至相對流涕後爲兵部

右侍郎總督三邊軍務卒謚襄敏

延安鎮志

任傑西安人總兵寧夏以才望調延綏賞罰明信謀勇兼

長爲敵所憚尤能制驕作懦實名將云

延綏鎮志

楊錦字尚絅山東益都人進士以戶部郎任靖邊兵備副

使創建龍圖書院威名流著子邦憲字孝徵萬歷進士亦

以戶部郎出知西安府有異績擢關內兵備副使陝東大

治轉補神木及榆林兩道以計擒巨盜麻四等擢左布政

使

延綏  
鎮志

陳鳳延綏總兵嘉靖三十六年三月虜寇延綏鳳死之賜

贈脣祠死所

通志

程軌字信甫山東臨清人進士監察御史擢陝西副使歷  
布政進右副都御史四十年夏總督防秋令總兵曹世忠  
中軍金輅千總王節把總陳源殿敵襲陳源源戰死輅等  
弃弗援敵遂東掠安邊定邊西至螺山全陝大震軌論罷  
壬戌春以原官爲三邊總督自陳源戰後士氣委靡公私  
既竭軌以廉約率勵將士爲文祭死事者哭而賑恤之軍

復振敵入塞軌遣總兵趙奇吳鼎等迎擊之十月復薄清  
水營軌命總兵許經戰却之前後斬首八百餘級捷上賚  
白金文綺趙奇等皆磨錦衣巡撫孫慎磨官生軌獨未陞  
磨以嚴嵩阻也

賈志

王遴字繼津霸州人進士嘉靖四十五年以右僉都御史  
巡撫延綏賦性鯁介釐奸剔蠹一時饕餮將吏凜凜改絃  
會東路兵燹後因之歲惡民多流徙遴造舟糴晉粟食之  
始得存活又僉中路清平孤險請增將樹兵衛之後敵果  
萬騎薄城下以有備去又築中河至保寧大邊及鎮鄆邏  
城仍請增府同知一員專職城堡皆永利實政

賈志

郭琥字宗器永昌人以功晉延綬總兵官佩鎮西將軍印  
大司馬王遴撫延綬氣槩高一時琥持體不少遜遴初銜  
之已察琥忠勇廉幹遂親厚琥勁骨猿臂善騎射不知書  
而以意作檄頗中肯綮持身潔與人恭在軍鎮肅軍民不  
擾

賈志

郃光先山西長治人進士任延綬右副都御史老成簡重  
文武率嚴憚之綱繆邊事不遺餘力築雄石硤以東大邊  
三十里保寧至波羅大川口五十二里有金城之固以功

陞大司馬

延綬  
鎮志

張守中字大石山西聞喜人舉人以右僉都御史巡撫延

綬甫下車卽抑豪橫懲貪墨肅紀綱戒淫侈惟修實政不  
事鋪張若鎮城暨諸邊堡城垣衙宇學宮倉廩皆躬蒞其  
所規畫指示殫力經營時軍民禔福奸宄斂跡

賈志

沈楠字汝林仁和人進士巡按陝西下車問民疾苦延見  
藩臬諮吏治得失及部中豪不法與廉去墨威暴澤枯孽  
孽弗逮又憫延綬兵馬入衛疲勞分辦花馬池鹽課利害  
方欲條上以疾卒櫬發白衣冠送者如堵

賈志

王世揚字孝甫廣平人進士以御史按視茶馬值歲祲蠲  
贖銀二千金復流請茶課二千金賑之甘肅故以藩爲蔽  
蕃與秋闕世揚躬翼約束烽堽頓消歲增賦四五百七十

騎省椿朋金五千有奇遷理卿仍兼御史閱視延綏世擢  
故諸九塞詭譎調成爲次第閱實馬如初市他所設施皆百  
年至計最後條十事上嘉納之下所司覆著爲令

賈志

王汝梅安肅人進士萬歷九年任延綏右副都御史時值  
大饑邊餉告匱汝梅竭力救荒蠲租請賑生活者數萬人  
凡作養士氣培植民生區畫殆盡西陲以安

賈志

梅友松四川內江人歷陞延綏巡撫嚴守備勤訓練諸番  
懾服晉都御史兼兵侍總督三邊條上十二事皆報聞無  
何歸里當世以邊才論薦者首先屈指云

四川通志

麻貴大同人萬歷中延綏總兵簡練軍士信賞必罰用降



卒爲鄉導善伺敵間而乘之嘗臥病聞警輒起夜出師俘  
馘甚衆已又窮追之殲其渠魁又分軍爲九自以大軍獨

當一面大捷

舊府志

孫惟城山東邱縣人進士累官僉都御史萬歷辛丑巡撫  
延綏時秋霜害稼地方艱食惟城憂形於色多方賤貨全  
活甚衆總兵時以苞苴入每裁抑之士以事至輒降色加  
禮教以爲善邊人洗心滌慮稱所未有卒於官聞者莫不

墮淚

賈志

涂宗濟江西南昌人進士巡撫延綏刊聖學源流修學宮  
朔書院建文塔置學田增廩餼改武庫周悉備至又葺城

臺創鎮志俱稱不朽

延綏鎮志

黃嘉善山東卽墨人進士自寧夏巡撫總制陝西三邊軍務矢志安攘甘延兩鎮累報奇捷朝廷稱社稷功更修廟學置學田以養士人才蔚興詔進兵部尚書

賈志

馬呈秀字君實江都人萬歷甲辰進士知延安賊入境親督兵捕擊擒其渠魁招復流民萬戶墾荒田數萬畝卒祀

名宦

江南通志

劉敏寬山西安邑人進士以右僉都御史巡撫延綏簡書總制陝西三邊軍務所至簡兵蒐乘備儲精繕城堡而料敵又先見如神自撫至督共計捷三十有奇爲人慷慨有

大畧與諸將吏推心置腹更喜與諸生譚道論文榆人感德立生祠以祀之

賈志

曹文詒山西大同人膂力絕人賊咸憚之崇正二年以援京師有功補延綏東路副總兵其冬土賊王嘉引聚衆爲亂攻陷木瓜圍堡渡河掠茱圉溝文詒擊却之追斬之於陽城陞臨洮總兵官

延綏志

崇正八年流寇高應祥張獻忠

等率賊數十萬劫掠州郡破隴州扶風鳳翔趨郿縣文詒

同孫守法協力擊之於盤屋南山下大破之生擒高應祥

獻俘京師獻忠遁入蜀

賈志

馬從聘字起莘靈壽人萬厯己丑進士延綏巡撫閭部數

推上俱不當上肯因疏舉從聘詔可時西鄙屢有警從聘  
核兵簡餉繕器械增墩率同鎮臣杜松獲大捷者三上手詔  
嘉與勅本兵察叙丙辰以病諸章五上許歸

徵補志

劉三顧山東海豐人舉人崇正初知洛川性嚴介有邊才  
固封疆緝盜賊尤崇文教尋陞知府時賊益猖獗所至攻  
陷三顧練勇壯繕城塹多方設備率衆守禦間出民兵殲  
其渠魁又請減練餉民賴以甦陞監軍道畫策設伏每戰  
輒捷總制洪承疇倚爲左右手

舊府志

金忠士南直休寧人進士任榆林兵備有軍功特簡僉都  
御史巡撫延綏聚精積芻陰備不虞敵入套忠士密與大

將軍杜文煥計議率精兵破之邊功甚著以積勞卒於任

榆人立祠視之賈志

王承恩號錫宇西寧人崇正二年以臨洮總兵勤王收復四城晉左都督調任延鎮四年七月賊首上天龍馬老虎獨狼掠鄜州列三營於太平原承恩擊破之上天龍等以二千人降賊滿天星等自合水叛去攻中部承恩帥師往討斬獲賊首萬餘級生擒二千餘衆捷聞加太子太保十一月賊首譚雄陷安塞不沾泥張存孟等陷安定承恩克安塞斬五百餘級卽進剿安定賊潛走綏德混天猴等陷甘泉殺知縣郭永圖河西兵備副使張允登戰死洪承疇

遣承恩分剿之五年十月承恩敗安塞遺賊於西川吳堡賊首喬六自斬其魁以降餘遁走延綏稍寧尋以華州兵

潰謫去

延綏鎮志

岳士望鎮西人任靖邊同知神賊攻城士望調度守禦危坐敵樓上矢石雨下神色自若或勸之使避士望張目叱之內安人心外挫敵氣城賴以全

延綏鎮志

陳奇瑜山西保德人進士崇正五年以陝西左布政推巡撫延綏清介有守在藩司時有羨金二萬時延鎮大饑死者枕藉奇瑜盡以賑濟全活無算六年十二月賊盡入山西兼走河南延綏賊首鑽天嘯開山斧獨據永寧關阻險

數年不下奇瑜假總督檄發兵七千抵延川潛師疾走賊  
不虞大兵至倉皇奔潰擊賊首一座城并斬之進兵都右  
郎總督陝西山西河南湖廣四川軍務延綏鎮志○按歲制時賊就撫至於失機誠爲非計但據延綏鎮志載其延撫延綏賑破賊功在斯民未可畧也故並志之以見功罪不相掩之義

尤程文定邊副將勇敢善戰臨敵不事刁斗賊素知其名  
及圍城時程文屬共徒千人開南門出戰賊爲辟易顧見  
程文所將盡步卒因招聚復進程文力戰歿舊府志

張伯鯨江南揚州人進士任延綏餉儲廉介自矢遇旱虔  
禱歲饑捐賑活人甚衆延人叩閭闔保陞榆林道又陞延

撫歷官二十年視民如子延綏畫像祀之

賈志

劉廷傑綏德人進士爲延綏撫標叅將以防寇駐綏德設武備謹斥堠不辭勞怨已而闖賊至廷傑回鎮激以大義遂與榆林諸將廷傑怒目曰爲朝廷守城者我也寧死不貽君父羞賊怒支解之父爨鼎聞之嘆曰吾有子矣

延安府志

按明巡撫延綏又有徐廷璋羅山人陸矩阜城人王銳遷安人盧祥東莞人劉忠漢州人金獻民綿州人張宏正定人萬潮進賢人賈仁元萬泉人陳其學登州人楊守謙長沙人鄭汝璧縉雲人明延安府知府趙楫濟寧人栗登巴縣人李涵遷安人洪濟遠江陵人党馨益都



人王國珣猗氏人許明陞杞縣人李含樸房山人明延  
安府同知徐崇德濟寧人傅裕泰安人張鑄平谷人閻  
禮洛陽人聶世潤劍州人通判崔恕保定人推官柴思  
恭保定人姜鵬息縣人顧成正崑山人明延綏都指揮  
僉事李永定榆林人延安衛都指揮劉傑失其籍周誠  
順義人張鵬定遠人皆有政績而舊志不詳其行事故  
附見于此

延安府志卷五十四

傳錄一

前政

國朝

宋從心杞縣舉人順治五年知延安府六年王永強據榆林檄至延安從心與守備萬廷貴集衆誓死守因共碎其檄永強兵至大怒籍其家執從心至城隍廟不屈遂遇害廷貴死於獄妻某氏亦罵賊而死

通志

劉士英河間人官定邊營守備朱龍之亂弁兵皆降附士英不屈賊怒下士英獄已而令出與家人計議士英至家

乃積薪舉火悉取衣貲投火中家人從之遂自剄未絕復擲身入火死妻妾郭氏李氏俱死之

通志

王正志字灝夫靜海人順治二年以右僉都御史巡撫延綏時邊塞初附正志多方綏輯兵民乂安五年冬大同姜瓖變起瓖故榆林人也謫言謂姜兵且至六年正月正志檄調延安叅將王永彊同總兵沈文華駐兵防河永彊夙父事正志故正志任之然恃勇素跋扈二月永彊勾神木賊高有才襲榆林因率兵夜至城下聲言姜逆分兵過河將歸守延安遂入駐凱歌樓及曙正志議城守永彊偵知有才兵至卽倡衆開城延賊正志聞變知不免急走準提

寺死之時戶部郎中朱子昇以督餉至榆林亦死之馮如  
京代州人恩貢順治二年官靖邊兵備副使時巨寇黃色  
俊以闖孽嘯聚進逼靖邊如京料民兵得數百人登城固  
守伺間出奇擊之賊大敗遂乘勝擣巢滅賊而還事聞賜  
賚有加

延綏  
縣志

陳熲字公朗孟津人順治丙戌進士歷官山東右布政使  
順治十五年陞陝西左布政使十六年入

覲條奏五事大略言秦民之困宜加軫恤而延安地畝折正  
一事尤屬要務延安土瘠民貧舊例四五畝折內地一畝  
起科自興屯道白士麟暨同知高應選督墾荒地按畝報

加五倍前務殲疏入得減延民頌之先殲之父中丞惟芝  
嘗爲延之洛川令殲因深悉延民之苦及任秦藩得行其  
志在任三年省事寧人與民休息以積勞卒官

通志

沈文華奉天義州人順治三年以都督同知充延綏總兵  
官六年正月文華因姜瓖之變自鎮城移兵駐黃河防賊  
西犯檄延安叅將王永彊以兵協防清水營及黃甫川諸  
路會神木賊田秉德張秀首亂推廢將高有才爲主大肆  
焚劫二月永彊忽撤兵走榆林文華知永彊有異志率兵  
追襲至神木陷有才伏中爲所得死之

通志

膚施縣

明

張著知膚施縣民頻年避兵窟匿山谷著招諭歸業修舉廢墜民始知有太平之樂有鄒二者不孝著訓誨化之爲孝子

王瑾安肅人知膚施縣陞知延安府仁而多善政歲荒又大疫開倉賑濟多所全活

王體太原人進士以御史左遷膚施令歷知延安府爲政寬和而惠民皆德之上言乞敕撫按分巡等官以時行邊從之

董汝豫河南舉人知膚施縣刑清政簡建學崇文蠲火耗

革行戶士民至今尸祝

呂封齊進士知膚施縣又署宜川清正不阿

以上俱縣志

安塞縣

明

韓震山西人宏治時知安塞勞心撫字加意斯文城北逼大河暴水城壞震抗疏請命殫力修築水患以平民立碑

紀之

縣志

韓弼字良佑蒲城人歲貢嘉靖間任安塞令愛民如子親課農桑治墾墾修文廟以邑城逼邊土基難久遂鳩工改築砌石十三層築口磚甃儼然金湯祀名宦

縣志

國朝

柴國弼遼東人歲貢知安塞長於禦侮明戰守之法衝鋒破賊城賴以全以疾卒邑人思之祀名宦

舊府志

陳炳河南孟津人舉人知安塞時大仇道殲相望寇盜充斥炳煮粥活人以千計復力捍孤城邑人賴之

舊府志

黃瑤字白雲四川忠州人舉人順治四年任安塞令才智

明敏遇事敢爲殘軀大有起色六年王永強作亂瑤誓死

守孤城力拒強敵卒殞於難事

縣志

甘泉縣

宋



蔡公真嘉祐中甘泉知縣有仁政去後民思之圖其像於學宮其贊畧曰紀其本見於竹帛傳其末觀乎丹青祀名宦

元

張鼎成治縣有善政以卓異聞歷官參知政事邑人思其德不忘祀名宦

明

王伯易甘泉丞惠愛及民仁聲上達陞米脂知縣祀名宦  
郝鏗山西平陽府吉州人正統中知甘泉愛民如子去後多思之祀名宦

張軾山西忻州人正統中任甘泉主簿有善政陞洛川知縣歷綏德知州祀名宦

王鳳進士成化中知甘泉卜縣治西南創建學宮立規課士善政宜民祀名宦○按文廟銅爵鏤公名者尚餘八隻成化己亥年造經兵燹而僅存其亦魯靈光矣

徐珩閩苑人爲縣學訓導學行並優陞岷州學正崇祀學宮

高桂山東東萊人進士萬歷間以禮部郎中謫知甘泉有惠政改遷學宮於東南文教大興祀名宦

王嘉量北直人萬歷末知甘泉均賦徭調驛站開荒蕪招

流移又加意作人駕泮池石橋建魁星閣重新城隍廟東  
嶽宮修廢舉墜勤于政治

蒲來舉四川人知甘泉縣賊來犯守備孫守法等擁兵不  
救城破手刃一賊傷六賊而死○按省志從續表忠記採  
入註籍失考稿本有公籍而不及其事其拒賊係何年遂  
無可攷矣

郭永圖山西人知縣事崇正四年流寇混天猴等攻陷甘  
泉被執不屈罵賊而死

國朝

蔡祖庚字蓮西號鶯巖江南上元人順治乙丑進士任甘

泉知縣亂離之後土荒民散而查荒舛錯豁除不能如額  
縣民逃亡殆盡祖庚下車目覩流離卽躬赴省臺哭訴民  
艱除荒卒如所請又革去驛站馬頭以及里中科派縣民  
德之在任四載陞戶部主事歷太原府知府所至皆有政  
績甘泉爲立生祠歲時享祀按祠在審店礪上今僅存石  
坊又與黃公日煥並祠東倉院內

余明葵福建枝江人進士順治十一年尹甘泉時民多穴  
處蓬蒿滿城瓦礫堆署僅構茅簷以蔽風雨乃核定實在  
戶口詳豁逃亡丁名於是縣民漸有土田室家之安祀名  
宦

劉汝垣直隸任邱人歲貢生順治末蒞任時城中居民廨少學校公署遭兵火殘燬無存而四鄉佛宮尚多在者乃命留闕帝廟其餘寺觀悉令毀之取其材木修學校葺察院立公署城中于是有室廬焉後卒於官署

王燦字子美浙江紹興人進士康熙十四年朱龍叛府城已陷率吏民守毛家菴砦賊日夜環攻極力捍禦賊誘之曰得見王令卽輟攻燦曰吾不忍一人之故殃及吏民也遂單騎出砦賊擁之北行伺間以所佩印置烟洞中賊授以官爵曰吾爲朝廷吏豈肯爲賊吏乎拒之後間行歸會大兵至分兵勦賊遂復府城陞潼關廳

黃日煥字媿我福建永定人進士初仕廣西知縣康熙十年補甘泉時承平已久賦薄徭輕而甘泉每丁尚徵銀四兩六錢零正額外包賠浮銀四百九十餘兩徵收三十餘年無能清釐日煥細核外錯處再四詳請遂清豁免勤於圖治常巡閱鄉庄勸課農桑一馬一僕無許供帳旣又詳免府屬輓運遂民尤德之陞邳州知州縣民立生祠祀之○按祠在東倉院內並祀太守毛公及知縣蔡公

姜朝勲字廣成江南丹陽人進士康熙四十三年任農事旣興親詣田畝一人携酒一人持杖勤者賞以酒惰者懲以杖其有貧不給者發粟貸之尤勤於課士創立義學延

師課誦遂有登鄉科者五十四年陞吏部文選司民歌之  
口居官十一載留恩千百年祀名宦

吳敦儉字友裴號約齋江南休寧縣人雍正四年任吏治  
練達決獄明敏倡修學宮及衙署壇宇在任十四年奉憲  
檄往哈密協理公務卽以其弟敦儼攝縣事人以爲榮使  
還推陞廣東肇慶府同知又調浙江杭州府同知以上俱  
縣志  
保安縣

明

朱通宛平人知保安廉勤不阿

陳志

南秦洪洞人知保安處事剛明

陳志

何定保定人知保安決訟嚴明爲政簡要民賴之

陳志

陳暹太平衛人舉人知保安措置有方政事振舉吏民懷

德

陳志

唐理河間人舉人知保安歲荒煮粥又延醫治疫全活甚

衆死無棺者損俸給之作勤農四歌教民建學立社課文

又作時雨書院卒於官百姓號泣如失慈母

賈志

王正武清人知保安寬仁愛下政簡民悅

舊志

黎昌期廣東人貢生知保安值城殘之後獨守孤城就甕

城作官衙與子遺同甘苦自耕田以贍饘粥久任清苦以

卓異陞部郎

舊志



國朝

寶斯在沁水人由教習授保安令攝靖邊同知所至有聲  
積康熙壬申癸酉間西醜跳梁斯在年逾七旬詣當事請  
自效不許乃固請或以其老卻之憤而起白髭盡張曰斯  
在男子也以老廢奈何當事壯之令督運斯在走塞外往  
還萬里口不言勞比得疾猶商榷邊事口條手畫咸中肯  
綮歿後貧不能殮士民賻之乃歸葬

通志

安定縣

金

張亨大興鄆陰人爲勸農採訪使明達吏事卓有可稱

元

李德源至正中爲縣尹興學勸農均役息訟民爲立遺愛

碑祀名宦

明

黃惠福建人清慎公勤調廬江令

劉整山西孟縣人有政績民思之

鄭洪汶上人有廉聲陞南京光祿寺丞

李殷博平人政平法嚴清苦自甘

曹璉彬陽人進士以大理少卿叅贊延綏軍務有守有爲

軍民賴之巡視安定輿情愛戴

徐彬榮陽人保障民人治功顯著去後民思之

按縣志又載杜讓考

讓係甘肅安定今不載

王道廬陵人廉能著聞

曹銘臨清人修築城池營建官署屢官保定通判蒲州知州

劉鑑陳州人舉人政尚寬厚不事煩苛遇旱賑恤全活甚衆

王溥遷安人舉人政治公平愛民如子陞知寧州士民送者擁道不得去號泣而別

楊岱太原人才識明決優於理繁調富平士民遮道留之

范盈曲陽人持身不苟視民如子省歛薄稅嘗出俸置銅鑄祭器人悅服

郭廷臣字調元蒲州人舉人嘉靖六年任振興學校

李時北直魏縣人貢生嘉靖二十二年任四年套敵入犯以戰守保全生民

田應弼號兆浦北直鷄澤人舉人嘉靖二十七年任有善政民思之稱頌不衰

孫黃字臨峪河南洛陽人舉人有政績及建學宮

王光祖字孝標河南南陽人舉人萬歷二十七年任建敬學書院著訓士編教士子著縣志大畧留心民瘼大有功

續紀名宦

粘鍾鼎字衡南福建晉江人舉人萬歷二十二年任清介無比

高天命字懷我號仲穆河南德州舉人清介絕俗優崇學校愛養編民恩威並用綽有師保之稱

邱雲華字樛子一字嗣林山東諸城人進士萬歷三十年任日以作興人才爲已任治民事神大有賢聲陞南京大理寺右評士

喬鍾秀山西定襄人恩貢生萬歷三十四年任善政宜民有功城社

王慶遠山東臨邑人恩貢生天啟三年任清介絕倫精明果斷弭盜多方安堵如故地方實嘉賴之時有民耕得遺金百兩一人來告公曰是你地耕出他地耕出答曰是他地耕出但當入官公曰你也耕去如耕出我也不要你入官其民慚而退其公平類如此者陞綏德知州民思慕之祀名宦

張文耀雲南人舉人慈祥多才能民稱頌之

胡燔山東金縣人慈惠清介崇正七年爲邑宰緼袍粗糲寒士所不堪公處之如一日日以捐俸賑急爲事言貌舉動無愧古人賢者稱其德不肖者服其誠稱循良不愧也

國朝

李嘉應泰州人順治七年任時兵燹後民氣未蘇公簡靜廉愛與民休息且日以昌明理學興起斯文爲己任課士于命一題自作數藝爲程式尤工書法人至今有藏李公真蹟者如獲拱璧焉著有廉說載文徵

王滙字彭濱河南儀封人順治十三年以進士任時荒亂後隣邑競報開墾圖紀錄究之民困而官亦累公未嘗輕報一丁以貽民害三邊驛站每歲私幫需銀三百金久沿爲例公力爲詳請得永裁革焉錢糧積欠弊在用里長爲催徵公設自封投櫃法嗣是無遺賦隣縣皆倣之待士有

禮馭民以慈然人亦莫敢干以私聽斷明決無留獄役惟  
用木皂自奉甚儉日用見發價值無行戶之累居二年百  
廢俱興以內艱去民爲立去思碑閱十年碑毀又重爲選  
石詳勒政績以垂永久此亦見公之德令人沒世不忘也  
朱尚義字質菴一字靜齋義州人康熙四年以拔貢任政  
事明敏胥吏肅清祀名宦不愧也

張鼎新字公調北直大名入康熙二十七年以進士任持  
身以廉待物以恕催科不擾刑罰惟平丹筆不輕下自書  
一行於內署曰左右近習之言勿聽吏悚然股慄民皆悅  
之至今猶稱生佛張老爺九甲各立一碑以志遺愛



廖均字予衡福建上杭人康熙四十六年以舉人任廉惠  
端雅愛民禮士一本於誠公餘坐二堂簷下手不釋卷或  
觀稼郊外偕僚屬紳士觴咏竟日尤作興人文月課季考  
經賞識者皆登賢書在任八年設義學建橋梁革行戶修  
神祠築城垣皆實心實政也士民愛戴不忘云

向兆麟字石邨京山人以舉人歷任廣文陞洛川縣知縣  
廉惠著名攝安定縣事簡靜慈愛以平反疑獄鄉人德之  
城堡俱立有去思碑去三年士民又從兆麟於洛製錦爲  
祝嘏焉兆麟楚中名士所著有雪麓詩文集和李文正公  
陶密庵咏古樂府二卷行於世字畫亦有名

以上俱  
縣志

宜川縣

宋

張載字子厚郾縣人進士爲雲岩令以敦本厚俗爲先每月朔具酒召耆老會於堂上親爲勸酌俾知養老事上之義問民疾苦及告所以訓誡子弟之意祀名宦

王克含丹州多惠政

金

赤盞尉忻上京人丹州刺史累官至尚書右丞

王若虛字從之藁城人擢承安二年經義進士調鄜州錄事歷管城門山二縣令皆有惠政秩滿老幼攀送數日乃

得行後轉延州刺史

明

張釋清苑人宜川主簿薦陞知縣有守有爲民懷其惠祀  
名宦

張倫澤州人知宜川歷任未半載直指薦調蒲城民赴京  
奏保復留宜川愈加清慎勸課農桑興利除害政績卓異  
爲當時最祀名宦

符仕寧陵人知宜川廉明正直勤慎果毅歷陞副使祀名  
宦

周維翰阜城人廉潔奉公奏記上官革協濟甘泉之累民

蒙其惠

成材清源人崇正時知宜川時饑僅枕籍盜賊內訌材恩威並用撫綏饑民折衝外寇宜川賴以保全

彭耀江西人崇正末知宜川明敏精幹催科得法吏胥不敢爲奸

張允茂以州判署縣事獎善除奸一介不取陞安定知縣去之日士民餞送盡境乃止祀名宦

按省郡志皆失載見邑人劉嘉賓私記

蔡正環縣人解元性至孝以家貧就祿爲宜川教諭每食必供甘旨於親嘗危坐與諸生課講務以善道淑人

趙鑑河南尉氏人宜川丞爲政嚴明有豪民素結官府橫

行遇鑑歛跡生員劉述以妻死被誣鑑力出之

岑用寶廣東人以吏科都給事中降宜川丞剛方不撓雖  
居散職嘗乃心朝廷祀名宦

曹徵庸進士降宜川典史博覽閎辨造就人材以上俱縣志

### 國朝

陳辰銘濟寧人進士順治年間知宜川勸農課士多惠政

行取吏科給事中見通志職官

尤一德蒲州人順治年間知宜川王永強之變殉難見通志職官

郭一元魏縣人進士順治年間知宜川爲政寬厚陞常德

府同知

見通志職官

范式金秀水人順治十三年由監生授宜川縣知縣宜川自前令報墾之後丁糧增舊數倍邑民流亡過半式金撫字催科心力交殫又詳請憲司備陳民不堪狀得

旨俱照舊科折正減田額四百餘頃由是民力稍紓又鎮川魚河歸德三驛以宜邑民夫協辦多被勒索式金詳請定議以站銀解道民夫得免賠累歷任十二年以老去職猶以捏報丁銀開除未盡爲耿耿云

通志

延長縣

金

董成務前延長主簿履正奉公居廉守節士民詣闕請留  
賜緋增秩陞任縣令大定二十二載台省差官經營各縣  
城圉力爲督修不憚勞瘁又勸行孝弟旌別淑慝風俗爲  
之丕變士民德之

明

孫逢吉山西渾源州人天順年任廉能有爲不苟取予廟  
學衙署修舉廢墜廣積倉儲凶年全活甚衆士民立碑誦  
之歷官陝西布政使萬歷十一年知縣王嘉柟考覈事實  
詳請入名宦祠

婁鑑北直河澗人成化年任愛民如子親課農桑治壇墠

修文廟夜出巡閱讀書紡績記而賞之每朔望集諸生明倫堂親爲講授考課故門下多名士政聲日著上官聞之給匾旌獎萬歷十一年知縣王嘉柟請入祠

張旭陽北直清苑人嘉靖年任豈弟愛民真誠任事時延長土城傾圯外寇猖獗巡道方遠宜命修築之躬率董修易土以石是歲秋敵果入寇他方被殘縣獨晏然邑人立碑誦德

雷潔山西平遙人嘉靖年任居官九載平易近民崇文好士修城垣建節孝諸坊

王道明山東黃縣人萬歷年任潔已愛民振興學校建文



廟石坊修鼓樓碑載功德

王嘉柟山東掖縣人萬歷年任儀度雍容平易近人諸凡  
措注先教化而後政治民有孝弟力田者旌之士勤課誦  
給膏火紙筆於文廟內增建名宦鄉賢二祠崇祀前哲萬  
歷三十五年卒於官知縣王崇素詳請入祠

趙永祿北直獻縣人大德及民實政感孚時狼虎爲害白  
晝噬人道無行客因竭誠祭祀遠徙他處又值歲旱露體  
禱於伍大夫祠甘雨立沛民人賴而傳之

張世英河南洛陽人萬歷年任廉明正直人不能干以私  
罷縣後家至不能舉火處之晏然里甲或賫柴米以送斤

不受其操持類如此

陳國柱山西猗氏人舉人剛直方嚴人不敢犯甫下車卽抑強暴懲貪墨豪猾歛跡居官惟務實政不事鋪張學官倉廩城堞廢弛時爲營葺延人感之立碑頌德

侯國勲山西大同人天啟年任清儉饒幹畧凡錢穀刑獄剖斷如流吏不敢欺又爲講鄉約砥俗維風一時城鄉有青天之謠

郝宏猷北直霸州舉人崇正年任負偉才有膽畧時巨寇號一字王嘯聚延水關所過皆殘預謀守禦作止部伍編成詩曲俾兵民習之不煩號令而行壘肅然賊至列陣單

騎詣其營諭以利害賊懼遁孤城無患縣人立詞西街祀之以孫惟訥貴誥贈吏部尚書順治年間配祀名宦

萬代芳遼東人崇正年任廉介自持慷慨有氣節時流賊犯境躬率士民修戰守之具及攻城晝夜堅守力盡城破退守上城用砲擊賊未及燃賊蜂擁而至乃北向再拜曰吾力竭矣遂遇害

胡允賓貴州石阡人崇正末年任時明運衰軍務勞午饑僅頻仍惟日嚴守禦便宜賑恤殘黎得安且精明果斷吏無憾法人不敢欺宏濟難民德才並裕

李如璧北直鉅鹿人順治二年任時鼎革之初諸事草創力爲區畫招撫安輯褒良屏惡縣有起色選俊秀子弟捐修脯延塾師訓之次第列庠者數十人亦有登仕籍爲郎者後以休去縣人泣送境外

張三異湖北漢陽進士順治六年任時值兵燹人民竄徙四野荒蕪乃招流移鬻產贖糧曾給予急公好義匾額歲旱誠禱立應蝗不入境四載政成陞南陽府同知縣人立祠西街康熙四十五年士民思慕舊德公呈知縣周兆鳳詳請列祀名宦後子伯琮任榆葭道過縣入祠祭奠作述并耀稱盛事云

董尚智直隸晉州人才識超卓爲政務順民心前苦諸稅  
並徵獨循次催之不刑一人而稅集善惡各有籍記擇其  
尤者榜於門各相懲勸民風丕變

舒暢浙江武康人進士順治十六年任時兵燹之後繼以  
洪水遺丁寥寥額賦拮据遂力陳包丁包糧之苦籲請具  
題四載命下裁減浮丁荒糧據見額實版籍流移漸復乃  
修城葺廨建倉興學歷十載陞雲南知州縣人思其德立  
碑城隍廟

李臬耀州人康熙年任縣學教諭學識充裕操行嚴介教  
士先器識而後文藝諸生雖燕見必以禮佻健者望而畏

之時王逆變亂屠戮甚慘集諸生於明倫堂考鐘擊鼓大言曰堂以明倫今日之倫何在城破繼死士民惜之平定後合詞呈請列祀名宦

孫芳馨遼東人康熙十四年任時寇毀新復城無居民防弁毀舍搶物聞車騎至悉避去時提督巡撫鎮府城名買繯草力爲支持不一貽累小民嗣奉

上命多方招回復業民入五百三十戶男婦老幼二千三百一十六名口乃爲省雜費減吏役禁私幫縣治漸有起色尤加意學校捐解寒士停免銀兩延師課讀重新學宮擬修縣志未就善政多端民至今稱之

張鳳羽山西絳州人舉人由學正陞任延長體貌魁梧性  
質直寬猛相濟善良特加旌異豪猾不軌者寘之重法人  
皆畏威懷德政務省簡而縣治亦晏然無事居官七載告  
歸縣人至今頌之

周兆鳳遼東人康熙四十一年任廉明果斷一切經費不  
攤派里下每過耕作單騎巡視有勤農者錢賞之惰則笞  
責聽斷兩造是非立剖胥役不獲售其欺上官嘉其才委  
署甘泉洛川神木靖邊各縣所至政聲如一居官十四載  
因糧解任士民思之

梁敦峻廣西全州人舉人居官廉明儉朴勤謹仁慈愛民

如子民亦愛之如父母因鄉薛侍郎家失盜捕獲賊招案支難結以親老告養去焚香爭送如雲且多泣涕者至今有梁青天之頌

趙西甘肅秦州人拔貢乾隆十二年任居官敏捷明斷有片言折獄之才前膚施有無影命案禍及十餘村公刑具不事判犯如神株連盡豁至今有趙青天之譽在邑首重祀典先師廟牲帛茶饌畧如闕里志學前創義路禮門及衝街圍牆城垣圯補築之舊署脉甚正奉

吾變價公爲捐置甫及三年延長頗有起色因內艱歸里至

今惜之

以上俱  
縣志



延川縣

元

王恪京兆人延佑七年任創縣治建公廨葺學校經管著

績至今稱之

傳志

明

陳沂慶符人舉人嘉靖八年知延川廉謹仁恕不尚威嚴

歲祲發廩賑貸全活甚衆

賈志

宋大本直隸新城人舉人嘉靖十年知延川愷悌及人忠誠任事革羨餘剔弊竇一切興除事宜悉綜理無遺年饑爲煮粥貸粟設法救荒饑民賴全活者數百人陞山西道

御史

賈志

劉崇禮直隸大名縣人選貢生嘉靖三十四年任廉能公正勤于政務凡農桑學校殫力興舉有古循良風民至今思之

縣志

毛儲元湖廣常德衛人舉人隆慶四年任潔清自治執法不撓奉文修城董率有方不數月卽竣功陞綏德州知州尋陞江南揚州府同知臨別縣人攀轅臥轍者以千計

陳王道山西寧鄉人舉人令延川調繁清澗遇奸吏輒與之法理獄剖決如流四隣控籲者皆假籍以希聽斷且持躬介潔遇士大夫不阿士尚其業民樂其生循聲大起擢

武正定

賈志

羅廣山西清源人舉人崇正初知延川時延屬土寇披猖孤城受圍廣訓練民壯誓衆死守城獲保全居北門城樓者五年終歲不返署歷陞戶部郎中

賈志

國朝

謝汝霖福建長樂人舉人康熙中任清慎勤儉雅意作人去之日民涕泣送之

縣志

李近陽四川嘉定人康熙中任清廉公正奉調塞外累立

軍功

縣志